

Vistu Protesaun

Esplikasaun



Muda konversa kona-ba **Protection visas**



Australian Government



Introdusaun

**Vistu Protesaun (Protection visa)
(subklasse 866) fó ba ema sira ne'ebé buka
azilu ho jenuínu no enfrenta risku réal atu
hetan danu signifikativu ka persegisaun
iha sira-nia rai.**

Governu Austrália lansa ona kampaña ida
hodi eduka ema sira kona-ba Protection
visas no konsekuénsia sira bainhira koko atu
aproveita programa ne'e.

Iha informasaun sala ne'ebé buras daudaun
kona-ba Protection visas ne'ebé habelar
entre comunidade sira, inklui entre sidadaun
Pasífiku no Timor-Leste ne'ebé hela iha
Austrália no rai-li'ur.

Informasaun sala ne'e bele hamosu
konsekuénsia séria ba sira ne'ebé aplika ba
Protection visa no sira-nia família.

Muda konversa kona-ba **Protection visas**

Kampaña ne'e iha objetivu atu fó
informasaun no instrumentu sira ne'ebé
nesesáriu hodi hapara informasaun sala
ne'e habelar ba ema seluk, no hodi garante
katak comunidade sira hetan konsellu
ne'ebé sira presiza.

Hodi kontra informasaun sala,
Departamentu Asuntu Internu fó asesu ba
[konsellu legál gratuitu](#) husi forneseidór
konsellu legál espesialista kona-ba
refujiadu no imigrasaun ba ema ruma
ne'ebé konsidera daudaun atu aplika ba
Protection visa.

Konsellu ne'e sei ajuda ema sira hatene
sekarik sira elejivel ba Protection visa, no
hamenus risku sira atu uza ajente
migrasaun ne'ebé la rejistadu no dala ruma
fó konsellu ne'ebé la loos.



Informasaun sala kona-ba Protection visas

Protection visas fó ba ema sira ne'ebé buka azilu ho jenuínu (ka sira-nia membru família) ne'ebé enfrenta risku réal atu hetan danu signifikativu se sira fila ba sira-nia rai ka iha razaun forte atu sente ta'uk atu hetan persegisaun bazeia ba rasa, relijiaun, nasionalidade, sai membru iha grupu sosiál partikulár ka opiniaun polítika.

Protection visa la fó ba ema sira ne'ebé hakarak de'it hela kleur liu iha Austrália hodi serbisu.

Asesor migrasaun sira ne'ebé la rejistadu no promove sira-nia servisu iha média sosiál no iha grupu chat sira online agora daudaun fó-hatene ema sira atu uza Protection visa nu'udar dalan ida hodi serbisu de'it ka hanaruk sira-nia tempu hela iha Austrália.

Asesor sira ne'e dala ruma fó-hatene rekerente sira atu fó informasaun ne'ebé falsu ka inkorretu no dokumentu falsu sira bainhira aplika ba Protection visa. Asesor balu husu osan rihun ba rihun hodi fó konsellu ne'ebé la korretu ne'e.

Iha Austrália, ilegál ba ema ida atu husu osan hodi fó konsellu migrasaun, exetu nia ajente migrasaun ne'ebé rejistadu ka profisionál jurídiku Australianu.

Empregador balu dala ruma oferese oportunidade serbisu iha Austrália ho fó-hatene ema sira ne'ebé kaer vistu temporáriu atu aplika ba Protection visa ho uza informasaun ne'ebé falsu ka inkorretu.

Estudante sira mós simu informasaun katak sira bele hela iha Austrália kleur liu no serbisu ho aplika ba Protection visa ho informasaun ne'ebé falsu ka inkorretu.



Risku sira husi informasaun sala

Halo ona mudansa boot sira ba sistema Protection visa hodi aselera tempu prosesamentu nian. Ida-ne'e signifika ema sira ne'ebé aplika ba Protection visa hodi serbisu de'it ka hanaruk sira-nia tempu hela iha Austrália sei hetan rejeita ho lalais.

Agora daudaun maioria husi aplikasaun foun sira ba Protection visa hetan desizaun kuaze **dala 8 lalais liu** kompara ho tinan hirak ikus ne'e. Ema sira ne'ebé entrega aplikasaun ba Protection visa ho informasaun ne'ebé falsu ka inkorretu enfrenta konsekuénsia séria, inklui multa boot no bele mós tama komarka.

Aplikasaun ba Protection visa ne'ebé hetan rejeita sei mantein nafatin iha ema nia rejistu imigrasaun. Ida-ne'e signifika bele susar ba rekerente no nia família atu filafali ba Australia iha futuro, maske kaer hela vistu vizitante, vistu estudante, ka vistu serbisu temporáriu.

Bele mós fó impaktu ba aplikasaun vistu iha futuro ba nasaun sira seluk iha mundu tomak, depende ba tipu vistu ne'ebé rekerente aplika ba.

Rekerente ba Protection visa ne'ebé hetan rejeita la bele aplika ba maioria husi vistu sira seluk no tenke sai husi Austrália. Se sira la iha vistu válidu bele hetan detensaun no hasai husi Austrália husi Australian Border Force (Forsa Fronteira Austrália). Rekerente dala ruma tenke selu fali kustu hodi hasai nia husi Austrália, ne'ebé bele iha kustu dolar rihun ba rihun.

Tinan ida-ne'e, Australian Border Force hahú operasaun foun hodi foka ba ema sira ne'ebé aplika ba Protection visa maibé hetan rejeita, no sira-nia vistu temporáriu mate ona, hodi tau sira iha detensaun no hasai sira husi Austrália. Operasaun ne'e kontínua.

Oinsá Ita bele ajuda

Númeru aplikasaun ba Protection visa ne'ebé rejaitadu mak aas liu tebes duké númeru aplikasaun ne'ebé hetan susesu, no rekerente sira husi Pasífiku no Timor-Leste agora daudaun iha númeru aas tebes ne'ebé hetan rejaita.

Aplikasaun sira ba Protection visa husi sidadaun Pasífiku no Timor-Leste iha númeru aas tebes ne'ebé hetan rejaita. Ba maioria husi nasaun sira ne'e, liu 90% husi aplikasaun ne'ebé finalizadu iha 2023-24 la kumpre rekizitu sira no hetan rejaita.

Komunidade no organizasaun sira iha Austrália hala'o papél importante hodi prevene prosesu habelar informasaun sala ba sira ne'ebé konsidera daudaun atu aplika ba Protection visa.

Ida-ne'e inklui hasa'e konxiénsia kona-ba risku sira bainhira entrega informasaun ne'ebé falsu ka inkorretu iha aplikasaun ba vistu no uza asesór migrasaun ne'ebé la rejistadu.

Muda konversa kona-ba **Protection visas**

Fó-hatene ema sira ne'ebé konsidera daudaun atu halo aplikasaun, katak Protection visas fó ba ema sira ne'ebé buka azilu ho jenuínu – la'ós ba ema sira ne'ebé hakarak hela de'it kleur iha Austrália hodi serbisu.

Se ema ruma ne'ebé aplika ba Protection visa husu Ita atu hakerek surat ida hodi suporta nia, Ita só bele halo ida-ne'e sei Ita fiar metin katak nia ema ne'ebé buka azilu ho jenuínu – ida-ne'e signifika nia enfrenta risku atu hetan danu signifikativu ka iha razaun jenuína hodi sente ta'uk katak nia sei hetan persegisaun se nia fila ba nia rai.

Enkoraja sira atu hetan asesu ba [konsellu legál gratuitu](#) husi forneseidór konsellu legál espesialista kona-ba refujiadu no imigrasaun iha sira-nia estado ka territóriu.



Oinsá Ita bele ajuda

Ema barak ne'ebé konsidera daudaun atu aplika ba Protection visa la hatene ka la komprende katak bele iha konsekuénsia sira se sira halo viajen ba nasaun ne'ebé sira buka hela Austrália nia protesaun hasoru nasaun refere.

Verifika katak ema sira ne'ebé dala ruma sei aplika ba Protection visa komprende katak:

- Se sira entrega aplikasaun ba Protection visa, dala ruma sira la bele halo viajen ba nasaun ne'ebé sira buka hela Austrália nia protesaun hasoru nasaun refere, maske sira-nia família hela iha ne'ebá.
- Se sira hetan Protection visa, sira la bele halo viajen ba nasaun ida ne'ebé sira husu ona azilu sein autorizasaun husi Governu Austrália, maske sira-nia família hela iha ne'ebá.

Enkoraja ema ruma ne'ebé konsidera daudaun atu aplika ba Protection visa atu hetan konsellu legál gratuitu husi fornecedor konsellu legál espesialista kona-ba refujiadu no imigrasaun iha sira-nia estado ka territóriu.

Konsellu ne'e bele ajuda ema sira ne'ebé dala ruma sei aplika ba Protection visa atu hatene sekarak sira elejivel ka lae ba Protection visa, espika prosesu aplikasaun no ajuda sira komprende konsekuénsia negativa sira se sira-nia aplikasaun ba Protection visa hetan rejita.

Oinsá Governu Australia bele ajuda Ita-nia comunidade

Ami enkoraja Ita atu fahe lia-menon sira tuir mai ho ema ruma ne'ebé konsidera daudaun atu aplika ba Protection visa:

1. Haree [website Governu Austrália](#) ne'ebé ofisiál hodi hetan informasaun liután.
2. Asesa [konsellu legál gratuitu](#) husi fornesedór konsellu legál espesialista kona-ba refujiadu no imigrasaun iha Ita-nia estadu ka territóriu.
3. Buka ajente migrasaun ne'ebé rejistadu iha [Gabinete Autoridade Rejistu Ajente Migrasaun sira](#)
4. Proteje Ita-nia an rasik no Ita-nia comunidade. Informa [Australia's Border Watch \(Austrália nia Monitorizasaun Fronteira\)](#) ho anónimu kona-ba asesór migrasaun sira ne'ebé ilegál.

5. Buka hatene sekarik [opsaun alternativa ba vistu sira](#) bele apropiadu ba Ita.

Departamentu Asuntu Internu prodús ona kartás, folletu informasaun, publikasaun mídia sosiál no material sira seluk ne'ebé Ita bele uza hodi ajuda informa Ita-nia comunidade sira kona-ba Protection visas.

[Ita bele asesu buat hirak ne'e iha ne'e](#)



Konsellu kona-ba oinsá tenke responde ba komentáriu negativu iha mídia sosiál

Iha informasaun sala barak kona-ba Protection visas ne'ebé fó daudaun ba ema sira ne'ebé hela iha Austrália no rai-li'ur iha plataforma no grupu mídia sosiál.

Se Ita haree informasaun sala kona-ba Protection visas ne'ebé fahe iha forum ka grupu online, Ita iha oportunidade importante hodi identifika informasaun ne'e nu'udar informasaun sala no promove informasaun loos ne'ebé hakerek iha dokumentu ida-ne'e, inklui link ofisiál – homeaffairs.gov.au/protection

Proteje Ita-nia an rasik no Ita-nia comunidade ho hasa'e konxiénsia kona-ba risku sira ne'ebé eziste se ema ruma entrega informasaun ne'ebé falsu ka inkorretu iha aplikasaun ba Protection visa ka uza asesór migrasaun ne'ebé la rejistadu.

Mak importante liu hotu, enkoraja ema sira ne'ebé dala ruma atu aplika ba Protection visa atu asesá [konsellu legál gratuitu](#) nu'udar pasu primeiru.

Obrigadu

ba Ita-nia partisipasaun



Muda konversa kona-ba **Protection visas**



tralian Government